

四庫全書

經部

欽定四庫全書

經部

周易易簡說卷三

詳校官太僕寺少卿臣李廷欽

通政使司副使臣莫瞻菴覆勘

總校官降調編修臣倉聖脉

校對官中書臣宋枋遠

謄錄監生臣魏溥耀

欽定四庫全書

周易簡說卷三

繫辭上傳

明

高攀龍

撰

天尊地卑乾坤定矣卑高以陳貴賤位矣動靜有常剛柔斷矣方以類聚物以羣分吉凶生矣在天成象在地成形變化見矣是故剛柔相摩八卦相盪鼓之以雷霆潤之以風雨日月運行一寒一暑乾道成男坤道成女

乾知大始坤作成物乾以易知坤以簡能易則易知簡則易從易知則有親易從則有功有親則可久有功則可大可久則賢人之德可大則賢人之業易簡而天下之理得矣天下之理得而成位乎其中矣

此夫子首明易之所以為易也夫易者何物也現前之物也乾坤非他天地之尊卑是矣貴賤非他天地之高卑是矣剛柔非他天地之動靜是矣吉凶非他天地間同方而類聚各物而羣分者是矣變化非他

天地之成象成形者是矣洋洋乎觸目而是者孰非  
剛柔相摩八卦相盪邪雷霆之鼓風雨之潤日月寒  
暑之運行成男成女之人物皆乾之所始坤之所成  
而乾之知始何其易也坤之成能何其簡也不易不  
簡非道也賢人可久之德可大之業莫非天地自然  
之理天下易知而易從故有親而有功也易簡而天  
下之理得三才之位參矣此所謂易也

右第一章

聖人設卦觀象繫辭焉而明吉凶剛柔相推而生變化是故吉凶者失得之象也悔吝者憂虞之象也變化者進退之象也剛柔者晝夜之象也六爻之動三極之道也是故君子所居而安者易之序也所樂而玩者爻之辭也是故君子居則觀其象而玩其辭動則觀其變而玩其占是以自天祐之吉无不利

聖人明於三極之道吉凶變化之決然而不易者欲揭以示人故設為之卦掛以示之觀其象而繫之辭

以明吉凶焉六爻剛柔相推而生變化焉故人事有  
得失示以吉凶之象人事有憂虞示以悔吝之象變  
化者象進退也剛柔者象晝夜也六爻之動盡三極  
之道矣易之序有其時有其位不可亂也故君子居  
而安之爻之辭陳其理著其戒不可悖也故君子樂  
而玩之居則因象而玩其辭動則因變而玩其占故  
動與吉會不涉凶途順天之道而自天祐之矣

右第二章

象者言乎象者也爻者言乎變者也吉凶者言乎其失  
得也悔吝者言乎其小疵也无咎者善補過也是故列  
貴賤者存乎位齊小大者存乎卦辨吉凶者存乎辭憂  
悔吝者存乎介震无咎者存乎悔是故卦有小大辭有  
險易辭也者各指其所之

彖言一卦之象爻言人事之變事有失得而言吉凶  
事有小疵而言悔吝善補過而言无咎觀爻之上下  
而貴賤之位列矣觀卦之陰陽而小大之象定矣觀

辭之吉凶而得失之辨明矣悔吝者所由以入于吉凶者也憂之則當嚴其介无咎者由有咎而无之者也善補則當震其悔以卦有小大故辭有險易指人以所之而使人不迷于所往也

右第三章

易與天地準故能彌綸天地之道仰以觀于天文俯以察于地理是故知幽明之故原始反終故知死生之說精氣為物遊魂為變是故知鬼神之情狀與天地相似

故不違知周乎萬物而道濟天下故不過旁行而不流  
樂天知命故不憂安土敦乎仁故能愛範圍天地之化  
而不過曲成萬物而不遺通乎晝夜之道而知故神无  
方而易无體

聖人作易與天地相準天地之道大无不包者充周  
而无外細无不入者密察而不遺聖人準則之而彌  
綸其道也仰觀天文俯察地理可見者為明不可見  
者為幽明者易之呈于有象幽者易之藏于无朕幽

明之故何以知之以易知之也原人之始而知其始  
于易反人之終而知其終于易死生之說易一陰一  
陽之說也精氣則物成其形魂遊則物變其故鬼神  
之狀易一屈一伸之情狀也惟其準天地故天地與  
相似惟其似天地故天地不能違以此為知故知周  
萬物以此為道故道濟天下无所不徧而不過无所  
不行而不流樂此之謂樂天知此之謂知命順天之  
命而居易也夫何憂焉安此之謂安土敦此之謂敦

仁因地之宜而厚載也何不愛焉夫豈惟與天地相  
似天地无心而成化此實範圍之使不過也萬物並  
育于天地此實曲成之而不遺也晝夜代謝于吾前  
此實通晝夜之道而常知也何者神无方所易无形  
體大无不包也小无不入也聖人似天地之道者即  
準天地之道也

右第四章

一陰一陽之謂道繼之者善也成之者性也仁者見之

謂之仁知者見之謂之知百姓日用而不知故君子之道鮮矣顯諸仁藏諸用鼓萬物而不與聖人同憂盛德大業至矣哉富有之謂大業日新之謂盛德生生之謂易成象之謂乾效法之謂坤極數知來之謂占通變之謂事陰陽不測之謂神

夫易陰陽而已矣一陰一陽之謂道也一陰一陽相繼而不已者善之流行也一陰一陽生物而成形者性之各正也仁者見此則謂之仁知者見此則謂之

知百姓亦日用之而不知也故君子之道民鮮能之  
而道豈難知哉目前森羅萬象皆是也顯而可見者  
即不可見之仁顯不顯于可見而顯諸仁藏而不可  
見者即可見之用藏不藏于不可見而藏諸用鼓動  
萬物如聖人之目見于世特不同其憂世之心運而  
無跡尸而不宰盛德大業日新富有生生而无盡生  
生者之謂易也道無象乾則確然而成象乾無為坤  
則隤然而效法效法者順承乾而若效法之謂之占

者極此之數而可知來也謂之事者通此之變而使  
不窮也謂之神者陰陽兩在而不測也百姓出入于  
其中而日用之道豈難知哉

右第五章

夫易廣矣大矣以言乎遠則不禦以言乎邇則靜而正  
以言乎天地之間則備矣夫乾其靜也專其動也直是  
以大生焉夫坤其靜也翕其動也闢是以廣生焉廣大  
配天地變通配四時陰陽之義配日月易簡之善配至

德

夫此生生之體廣矣大矣遠不可禦邇靜而正天地間物物皆是也大者大生也乾靜專而動直是以大生廣者廣生也坤靜翕而動闢是以廣生此之廣大與天地配此之變通與四時配此陰陽之義與日月配此易簡之善與天地之至德配謂之配者其為物不二也故善學易者觀天地則知吾心人心之靜而正者即遠不禦者也

右第六章

子曰易其至矣乎夫易聖人所以崇德而廣業也知宗禮卑崇效天卑法地天地設位而易行乎其中矣成性存存道義之門

聖人之德業盡之于易矣上達之知如天之崇下學之禮如地之卑知禮成性而道義出猶之乎天地設位而易行也成性者性本成必知禮以為德業則本成之性存存不息而所發者皆道義矣萬物統體一

天地知禮自成一天地人心之易與天地之易始配  
合无間故曰人心即易而未易言也

右第七章

聖人有以見天下之蹟而擬諸其形容象其物宜是故  
謂之象聖人有以見天下之動而觀其會通以行其典  
禮繫辭焉以斷其吉凶是故謂之爻言天下之至蹟而  
不可惡也言天下之至動而不可亂也擬之而後言議  
之而後動擬議以成其變化鳴鶴在陰其子和之我有

好爵吾與爾靡之子曰君子居其室出其言善則千里之外應之況其邇者乎居其室出其言不善則千里之外違之況其邇者乎言出乎身加乎民行發乎邇見乎遠言行君子之樞機樞機之發榮辱之主也言行君子之所以動天地也可不慎乎同人先號咷而後笑子曰君子之道或出或處或默或語二人同心其利斷金同心之言其臭如蘭初六藉用白茅无咎子曰苟錯諸地而可矣藉之用茅何咎之有慎之至也夫茅之為物薄

而用可重也慎斯術也以往其无所失矣勞謙君子有終吉子曰勞而不伐有功而不德厚之至也語以其功下人者也德言盛禮言恭謙也者致恭以存其位者也亢龍有悔子曰貴而无位高而无民賢人在下位而无輔是以動而有悔也不出户庭无咎子曰亂之所生也則言語以為階君不密則失臣臣不密則失身幾事不密則害成是以君子慎密而不出也子曰作易者其知盜乎易曰負且乘致寇至負也者小人之事也乘也者

君子之器也小人而乘君子之器盜思奪之矣上慢下  
暴盜思伐之矣慢藏誨盜冶容誨淫易曰負且乘致寇  
至盜之招也

天下之事至蹟也以聖人見之皆易也設卦以象之  
言其至蹟而不可惡也天下之動至亂也以聖人見  
之皆道也為之觀其會通之不可泥者以行其典禮  
之不可易者如是則吉如是則凶言其至動而不可  
亂也故卦爻之示人者使人慎于言動而已擬其當

然而後言議其當然而後動擬議者皆觀會通以行  
典禮而成其變化也是故中孚之孚天下者言行也  
如同心之言則其臭如蘭如藉茅之慎則无所失如  
勞謙之以功下人則不至亢龍之動而有悔不然言  
語鮮不階亂而負乘鮮不招盜矣聖人之象其物宜  
而斷其吉凶者如此以此擬議而變化成言動其无  
所失矣乎

右第八章

天一地二天三地四天五地六天七地八天九地十天  
數五地數五五位相得而各有合天數二十有五地數  
三十凡天地之數五十有五此所以成變化而行鬼神  
也大衍之數五十其用四十有九分而為二以象兩掛  
一以象三揲之以四以象四時歸奇于扚以象閏五歲  
再閏故再扚而後掛乾之策二百一十有六坤之策百  
四十有四凡三百有六十當期之日二篇之策萬有一  
千五百二十當萬物之數也是故四營而成易十有八

變而成卦八卦而小成引而伸之觸類而長之天下之  
能事畢矣顯道神德行是故可與酬酢可與佑神矣子  
曰知變化之道者其知神之所為乎

易主占此占法也所謂極數者極此數也天地五奇  
五偶積之為五十有五成變化者成卦爻之變化行  
鬼神者行鬼神之酬酢故揲著得卦顯陰陽之道神  
德行之用可與鬼神相酬酢而佑助造化之神功是  
知變化之道皆神之所為非人所能為也

右第九章

易有聖人之道四焉以言者尚其辭以動者尚其變以制器者尚其象以卜筮者尚其占是以君子將有為也將有行也問言而以言其受命也如響无有遠近幽深遂知來物非天下之至精其孰能與於此參伍以變錯綜其數通其變遂成天地之文極其數遂定天下之象非天下之至變其孰能與於此易无思也无為也寂然不動感而遂通天下之故非天下之至神其孰能與於

此夫易聖人之所以極深而研幾也惟深也故能通天  
下之志惟幾也故能成天下之務惟神也故能不疾而速  
不行而至子曰易有聖人之道四焉者此之謂也

易有聖人之道四焉聖人之用易有四也占則在辭  
中變則在象中皆著卦之法也參而伍之以通其變  
則成六爻剛柔相錯之文錯而綜之以極其數則定  
一卦內外兩體之象變者分二掛一揲四歸餘再扞  
之變參伍者爻之參揲而伍變也數者七八九六之

數錯綜者卦之往來上下也。无思无為寂然感通則易之體用也。精則能極深而通天下之志。變則能研幾而成天下之務。神則不知其所以然。而然聖人尚此四者以用易也。

右第十章

子曰夫易何為者也。夫易開物成務。冒天下之道如斯而已者也。是故聖人以通天下之志。以定天下之業。以斷天下之疑。是故著之德圓而神。卦之德方以知六爻。

之義易以貢聖人以此洗心退藏于密吉凶與民同患  
神以知來知以藏往其孰能與於此哉古之聰明睿知  
神武而不殺者夫是以明于天之道而察于民之故是  
興神物以前民用聖人以此齋戒以神明其德夫是故  
闔戶謂之坤闢戶謂之乾一闔一闢謂之變往來不窮  
謂之通見乃謂之象形乃謂之器制而用之謂之法利  
用出入民咸用之謂之神是故易有太極是生兩儀兩  
儀生四象四象生八卦八卦定吉凶吉凶生大業是故

法象莫大乎天地變通莫大乎四時縣象著明莫大乎  
日月崇高莫大乎富貴備物致用立成器以為天下利  
莫大乎聖人探蹟索隱鈎深致遠以定天下之吉凶成  
天下之亹亹者莫大乎蓍龜是故天生神物聖人則之  
天地變化聖人效之天垂象見吉凶聖人象之河出圖  
洛出書聖人則之易有四象所以示也繫辭焉所以告  
也定之以吉凶所以斷也

易者開物成務盡冒天下之道而其用則以通天下

之志成天下之業斷天下之疑是故著圓而神以知  
來卦方以知以藏往六爻變易以貢其義貢者顯呈  
之也聖人之心純乎易也故曰以此洗心密者无朕  
也退藏於密則寂然不動吉凶與民同患則感而遂  
通古之聰明睿知神武不殺者羲皇也明於天之道  
察於民之故興此神物開民之先聖人則以此齋戒  
而通其德于神明也是故乾坤為易之門坤者闔戶  
之謂乾者闢戶之謂變者一闔一闢之謂通者往來

不窮之謂凡可見者皆謂之象有形者皆謂之器可  
用者皆謂之法百姓之利用出入皆神也是皆易也  
而易有太極所以生兩儀四象八卦以定吉凶生大  
業也蓋三才自然之理不假絲毫智力而成故天地  
法象四時變通日月著明富貴崇高有莫大焉者矣  
而備物致用立成器以為天下利者孰有大於聖人  
乎探賾索隱鈎深致遠定天下吉凶之疑成天下亶  
亶之業者孰有大於著龜乎是天生之神物也聖人

則此神物以用易而效天地之變化象天象之吉凶  
則圖書之呈數所以示之象告之辭斷之吉凶者何  
莫非因其自然而作法以利天下耶易之所以開物  
成務冒天下之道者如此矣

右第十一章

易曰自天祐之吉无不利子曰祐者助也天之所助者  
順也人之所助者信也履信思乎順又以尚賢也是以  
自天祐之吉无不利也

子曰書不盡言言不盡意然則聖人之意其不可見乎  
子曰聖人立象以盡意設卦以盡情偽繫辭焉以盡其  
言變而通之以盡利鼓之舞之以盡神乾坤其易之緼  
邪乾坤成列而易立乎其中矣乾坤毀則無以見易易  
不可見則乾坤或幾乎息矣是故形而上者謂之道形  
而下者謂之器化而裁之謂之變推而行之謂之通舉  
而措之天下之民謂之事業是故夫象聖人有以見天  
下之蹟而擬諸其形容象其物宜是故謂之象聖人有

以見天下之動觀其會通以行其典禮繫辭焉以斷其吉凶是故謂之爻極天下之蹟者存乎卦鼓天下之動者存乎辭化而裁之存乎變推而行之存乎通神而明之存乎其人默而成之不言而信存乎德行

舉大有上交見書不盡言言不盡意然聖人之意以象而盡天下之情偽以卦而盡聖人之言以繫辭而盡又以六爻變易決其當從當違者以盡利而鼓舞天下使亶亶不倦而盡神也故易之蘊蓄乾坤兩畫

盡之兩卦成列而易立乎其中兩不立則一不可見  
一不可見則兩之用息故曰乾坤毀則無以見易易  
不可見則乾坤或幾乎息也乾坤陰陽也陰陽亦器  
也形而上者謂之道形而下者謂之器即器為道故  
即形而上下之蓋即易為太極非太極在易之先也  
道在故妙於變通化而裁之使不過謂之變推而行  
之使不窮謂之通變通則舉而措之天下之民為事  
業矣存乎者全藉乎此也卦藉以極天下之蹟辭藉

以鼓天下之動變則藉以化裁通則藉以推行至於  
神明於幾微之妙者全藉乎人默成其不測之用於  
言意之外者全藉乎人之德行也

右第十二章

繫辭下傳

八卦成列象在其中矣因而重之爻在其中矣剛柔相推變在其中矣繫辭焉而命之動在其中矣吉凶悔吝者生乎動者也剛柔者立本者也變通者趣時者也吉凶者貞勝者也天地之道貞觀者也日月之道貞明者也天下之動貞夫一者也夫乾確然示人易矣夫坤隤然示人簡矣爻也者效比者也象也者像此者也爻象動乎內吉凶見乎外功業見乎變聖人之情見乎辭天

地之大德曰生聖人之大寶曰位何以守位曰仁何以聚人曰財理財正辭禁民為非曰義

八卦成列而萬物之象無不備以八卦而重之於是乎有六爻六爻剛柔相推於是乎有變變者因天下之動聖人因天下之動而繫辭以命之吉凶悔吝皆生乎動也故易以剛柔為本剛柔以變通而趨時吉凶何常之有不入於吉則入於凶常相勝而存乎人之趨吉以勝凶也何以貞勝之觀天地之道不貞觀

乎日月之道不貞明乎天下之動貞夫一貞夫一而  
動無不吉矣豈難能哉夫乾確然示人易矣夫坤賤  
然示人簡矣萬古此易簡萬古此貞觀爻效此而為  
爻象像此而為象如此則吉不如此則凶爻象動乎  
著卦之內吉凶見乎事為之外功業即此變動而見  
聖人之情即此繫辭而見神而明之存乎人而已

右第一章

古者包犧氏之王天下也仰則觀象於天俯則觀法於

地觀鳥獸之文與地之宜近取諸身遠取諸物於是始作八卦以通神明之德以類萬物之情作結繩而為網罟以佃以漁蓋取諸離包犧氏沒神農氏作斲木為耜揉木為耒耨之利以教天下蓋取諸益日中為市致天下之民聚天下之貨交易而退各得其所蓋取諸噬嗑神農氏沒黃帝堯舜氏作通其變使民不倦神而化之使民宜之易窮則變變則通通則久是以自天祐之吉无不利黃帝堯舜垂衣裳而天下治蓋取諸乾坤剝

木為舟剡木為楫舟楫之利以濟不通致遠以利天下  
蓋取諸渙服牛乘馬引重致遠以利天下蓋取諸隨重  
門擊柝以待暴客蓋取諸豫斲木為杵掘地為白白杵  
之利萬民以濟蓋取諸小過弦木為弧剡木為矢弧矢  
之利以威天下蓋取諸睽上古穴居而野處後世聖人  
易之以宮室上棟下宇以待風雨蓋取諸大壯古之葬  
者厚衣之以薪莖之中野不封不樹喪期無數後世聖  
人易之以棺槨蓋取諸大過上古結繩而治後世聖人

易之以書契百官以治萬民以察蓋取諸夬

天地之大德生而已矣聖人體天地之大德生天地所生之人故以位為大寶以仁而守位以財而聚人理其財正其辭禁其為非是乃義也古之聖王莫不以之包犧氏之王天下仰觀俯觀近取遠取而知神明之德萬物之情始作八卦以通其德類其情因尚象制器取離而為網罟以佃漁也神農則取益為耒耜取噬嗑為日中之市黃帝堯舜蓋通變宜民取乾

坤為衣裳取渙為舟楫取隨為服乘牛馬取豫為豫  
備暴客取小過為白杵取睽為弧矢取大壯為宮室  
取大過為棺槨取夬為書契莫非易也易者生而已  
矣

右第二章

是故易者象也象也者像也彖者材也爻也者效天下  
之動者也是故吉凶生而悔吝著也

觀聖人之取諸易者是故易者象也象者像也彖則

言一卦之材爻則效天下之動吉凶悔吝紛然不一  
爻則視效之故吉凶生而悔吝著使人知之而善其  
動也

右第三章

陽卦多陰陰卦多陽其故何也陽卦奇陰卦偶其德行  
何也陽一君而二民君子之道也陰二君而一民小人  
之道也

天地之道陽尊而陰卑故陽君而陰民陽為主則為

君子之道陰為主則為小人之道陰陽者天地之道  
扶陽抑陰者聖人所以彌綸天地之道也

右第四章

易曰憧憧往來朋從爾思子曰天下何思何慮天下同  
歸而殊途一致而百慮天下何思何慮日往則月來月  
往則日來日月相推而明生焉寒往則暑來暑往則寒  
來寒暑相推而歲成焉往者屈也來者信也屈信相感  
而利生焉尺蠖之屈以求信也龍蛇之蟄以存身也精

義入神以致用也利用安身以崇德也過此以往未之或知也窮神知化德之盛也易曰困于石據于蒺藜入于其宮不見其妻凶子曰非所困而困焉名必辱非所據而據焉身必危既辱且危死期將至妻其可得見邪易曰公用射隼于高墉之上獲之无不利子曰隼者禽也弓矢者器也射之者人也君子藏器於身待時而動何不利之有動而不括是以出而有獲語成器而動者也子曰小人不恥不仁不畏不義不見利不勸不威不

懲小懲而大誠此小人之福也易曰屨校滅趾无咎此之謂也善不積不足以成名惡不積不足以滅身小人以小善為無益而弗為也以小惡為無傷而弗去也故惡積而不可掩罪大而不可解易曰荷校滅耳凶子曰危者安其位者也亡者保其存者也亂者有其治者也是故君子安而不忘危存而不忘亡治而不忘亂是以身安而國家可保也易曰其亡其亡繫于苞桑子曰德薄而位尊知小而謀大力小而任重鮮不及矣易曰鼎

折足覆公餗其形渥凶言不勝其任也子曰知幾其神  
乎君子上交不諂下交不瀆其知幾乎幾者動之微吉  
之先見者也君子見幾而作不俟終日易曰介于石不  
終日貞吉介如石焉寧用終日斷可識矣君子知微知  
彰知柔知剛萬夫之望子曰顏氏之子其殆庶幾乎有  
不善未嘗不知知之未嘗復行也易曰不遠復無祇悔  
元吉天地絪縕萬物化醇男女構精萬物化生易曰三  
人行則損一人一人行則得其友言致一也子曰君子

安其身而後動易其心而後語定其交而後求君子修此三者故全也危以動則民不與也懼以語則民不應也無交而求則民不與也莫之與則傷之者至矣易曰莫益之或擊之立心勿恒凶

夫易日用之常道也聖人舉十爻之最切要者推而明之舉咸之九四以明人之思慮也曰天下果何所思何所慮乎本同歸也人自殊途耳本一致也人自百慮耳往來者何為邪日月往來則得代明寒暑往

來則成歲功往來於吾前者如斯矣往則屈而來則  
伸屈伸相感則利生屈非不善也尺蠖之屈以求伸  
龍蛇之蟄可存身君子明乎屈伸往來之道惟求諸  
同歸一致之理精義焉而已矣精義入神則足以逢  
源而致用利用安身則足以立本而崇德過此以往  
未之或知窮神知化德盛致然非思慮之所及也而  
憧憧者何為乎故學不明於易簡之善未有不入於  
憧憧者欲彊過之不可得也舉困之六三以明小人

之困君子也曰非所當困而欲困其人徒辱爾名矣  
非所當據而欲據其位徒危爾身矣辱且危危且死  
妻且不可得而見奈何自作此不祥也邪舉解之  
上六以明君子之解小人也曰隼則集于高墉矣君  
子射隼于高墉非漫為也有其器器則成矣有其時  
動不括矣是以出而有獲也萬舉而一不當豈所以  
解哉舉噬嗑之初九以明君子之懲小人者乃福小  
人也舉噬嗑之上九以明小人之積小惡卒至於蒙

大禍也舉否之九五以明君子凜乎如危亡喪亂之  
在前者乃所以安身而保國也舉鼎之九四以明小  
人之肆然居尊謀大任重者乃所以自及於禍也舉  
豫之六二以明君子知幾則上交下交不諂不瀆為  
萬夫望矣非如石之介何以識不終日之斷乎舉復  
之初九以明顏子之復復於幾先易之所謂不遠復  
者如此也舉損之六三以明天地致一之道一不獨  
行三必損一兩立則一行為物不二故生物不測也

舉益之上九以明君子安其身易其心定其交民斯與之所以求諸民者無不本諸已也皆精義致用之事君子之所以用易者思過半矣

右第五章

子曰乾坤其易之門邪乾陽物也坤陰物也陰陽合德而剛柔有體以體天地之撰以通神明之德其稱名也雜而不越於稽其類其衰世之意邪夫易彰往而察來而微顯幽開而當名辨物正言斷辭則備矣其稱名

也小其取類也大其旨遠其辭文其言曲而中其事肆而隱因貳以濟民行

乾坤兩畫一陰一陽為易之門雖陰陽合德而剛柔有體所以體天地之事通神明之德者以此而已其稱名雜而不越此二者稽其類則皆物之情偽而衰世之意也彰著其往者察知其來者微其顯者使人見事之幾微闡其幽者使人見理之實象開示而當其名其物甚辨其言甚正其辭甚斷無所不備也稱

名於物象之小取類於陰陽之大辭不徒斷而旨遠  
辭文言不徒正又曲而中物不徒辨又肆陳而隱因  
民心之疑貳決之而濟其行以明失得之報有吉凶  
之應而不易也所以體天地之撰通神明之德者如  
此

右第六章

易之興也其於中古乎作易者其有憂患乎是故履德  
之基也謙德之柄也復德之本也恒德之固也損德之

修也益德之裕也困德之辨也井德之地也巽德之制也履和而至謙尊而光復小而辨於物恒雜而不厭損先難而後易益長裕而不設困窮而通井居其所而遷巽稱而隱履以和行謙以制禮復以自知恒以一德損以遠害益以興利困以寡怨井以辨義巽以行權

去古漸遠世風日下聖人憂患後世而作易也豈獨因貳以濟民行哉所以成其德行也是故非履則德無基以立非謙則德無柄以持非復則不能還其初

而德無本非恒則不能貞其守而德不固非損則有以損德者而德不修非益則無以益德者而德不裕非困則無以驗其力而德不辨非井則不能安其正而德無地非巽則不能以入其微觀其變而德無制也履和說而懇至謙自卑而尊光復入微而物辨恒當紛雜而有常損欲先難而習熟則易益但充長而不造作困窮於過而心亨井居其所而及物巽稱物之宜而隱其用於無跡也履上下有定而行为和謙德

盛禮恭而制禮復復於性以自知恒恒其心以一德  
損以遠欲之害益以興善之利困不得於人而不尤  
井不遷其止而不惑巽以通變行權得時措之宜也

右第七章

易之為書也不可遠為道也屢遷變動不居周流六虛  
上下無常剛柔相易不可為典要惟變所適其出入以  
度外內使知懼又明於憂患與故無有師保如臨父母  
初率其辭而揆其方既有典常苟非其人道不虛行

易之為書也不可遠而求之不可泥而求之天下事  
變無常故易道屢遷而不居周流六虛初無定位往  
來而為上下相易而互剛柔惟變之適其宜者以為  
典要不可執以為典要也出為外卦入為內卦有其  
卦則有其爻有其爻則有其位尊卑貴賤確乎其有  
度也悔吝憂虞凜乎其可懼也明於憂患之故如師  
保父母臨之欲不懼而不可得矣率循其所告之辭  
揆度其所向之道若有典常之可據苟非其人不能

神而明之以行道也

右第八章

易之為書也原始要終以為質也六爻相雜唯其時物也其初難知其上易知本末也初辭擬之卒成之終若夫雜物撰德辨是與非則非其中爻不備噫亦要存亡吉凶則居可知矣知者觀其彖辭則思過半矣二與四同功而異位其善不同二多譽四多懼近也柔之為道不利遠者其要无咎其用柔中也三與五同功而異位

三多凶五多功貴賤之等也其柔危其剛勝邪

一卦以六爻為始終六爻惟時物之相雜夫時者卦之時物者爻之位原其始則難知要其終則易知初為本難定其所向必辭擬之而後知上為末成一卦之所終故易知也雜物者雜八卦之物撰德者撰八卦之德是非者時物之是非皆於中爻備之彖辭言一卦存亡吉凶皆於中爻定之故觀中爻則一卦居然可知觀彖辭則六爻思亦過半矣二與四皆陰而

同功然位不同善亦不同二多譽以中也四多懼近君也柔不利遠要於无咎其用柔中而去剛中者遠矣三與五皆陽而同功以位不同故三居臣位而多凶五居尊位而多功柔居之則危剛居之則力能勝也一卦之始終皆隨六爻之時物類如此

右第九章

易之為書也廣大悉備有天道焉有人道焉有地道焉兼三才而兩之故六六者非他也三才之道也道有變

動故曰爻爻有等故曰物物相雜故曰文文不當故吉  
凶生焉

易書之廣大以三才之道無不備也下二爻為地中  
二爻為人上二爻為天故曰兼三才而兩之才猶才  
能三極不同其才同也故曰三才之道道有變動爻  
以效其動爻有遠近貴賤之不同故值其位為物如  
大射有耦立之物也物有剛柔之相雜故文文不當  
者陰陽之不當其位也

右第十章

易之興也其當殷之末世周之盛德邪當文王與紂之事邪是故其辭危危者使平易者使傾其道甚大百物不廢懼以終始其要无咎此之謂易之道也

危懼則無不安平慢易則無不覆傾惟懼而後得无咎此易道之要領也

右第十一章

夫乾天下之至健也德行恒易以知險夫坤天下之至

順也德行恒簡以知阻能說諸心能研諸侯之慮定天下之吉凶成天下之亹亹者是故變化云為吉事有祥象事知器占事知來天地設位聖人成能人謀鬼謀百姓與能八卦以象告爻象以情言剛柔雜居而吉凶可見矣變動以利言吉凶以情遷是故愛惡相攻而吉凶生遠近相取而悔吝生情偽相感而利害生凡易之情近而不相得則凶或害之悔且吝將叛者其辭慙中心疑者其辭枝吉人之辭寡躁人之辭多誣善之人其辭

游失其守者其辭屈

乾坤者六十四卦陰陽之畫德行者乾坤之德行不  
易則險不簡則阻險阻者皆人為之私非自然之道  
故乾至健恒易以知險坤至順恒簡以知阻也人心  
無險阻則說而能慮明於吉凶之故而成疊疊之事  
業是故變化於云為之間事之吉者知其有祥象則  
知其器占則知其來天地設位聖人以易成其能人  
謀鬼謀雖百姓亦與其能也六十四卦則以象告六

十四卦之爻辭則以情言剛柔雜居當位與不當位而吉凶見矣易之變動欲人行其所利如利貞之類而有吉有凶者皆以情遷也故有愛惡相攻遠近相取情偽相感之不同吉凶悔吝利害紛然不一矣蓋易之情近而不相得則有凶者有害者有悔且吝者皆以情遷也聖人之情見乎辭如將叛者之類有其情則見於辭不可掩也觀於辭而聖人之情見矣

右第十二章



說卦傳

昔者聖人之作易也幽贊於神明而生著參天兩地而倚數觀變於陰陽而立卦發揮於剛柔而生爻和順於道德而理於義窮理盡性以至於命

聖人作易幽贊神明之用始生揲著之法以天三地二倚之以起數故大衍之數五十也卦者陰陽之變爻者剛柔之推立卦生爻繫之以辭欲人和順於道德而條理於義窮理盡性以至於命也

右第一章

昔者聖人之作易也將以順性命之理是以立天之道曰陰與陽立地之道曰柔與剛立人之道曰仁與義兼三才而兩之故易六畫而成卦分陰分陽迭用柔剛故易六畫而成章

易以順性命之理在天為陰陽在地為剛柔在人為仁義易之六畫天地人之道也易以順天地人之道而已矣

右第二章

天地定位山澤通氣雷風相薄水火不相射八卦相錯數往者順知來者逆是故易逆數也

此伏羲先天之位所謂數往者順也至八卦相錯而為六十四卦則以著而成所謂知來者逆也易之數皆以知來故曰逆數也前不云乎著之德圓而神神以知來卦之德方以知知以藏往往來之至義明矣

右第三章

雷以動之風以散之雨以潤之日以暄之艮以止之兌以說之乾以君之坤以藏之

雷風相薄一以動之一以散之水火不相射一以潤之一以暄之山澤通氣一以止之一以說之天地定位一以君之一以藏之天地之定體定用也

右第四章

帝出乎震齊乎巽相見乎離致役乎坤說言乎兌戰乎乾勞乎坎成言乎艮萬物出乎震震東方也齊乎巽巽

東南也齊也者言萬物之潔齊也離也者明也萬物皆相見南方之卦也聖人南面而聽天下嚮明而治蓋取諸此也坤也者地也萬物皆致養焉故曰致役乎坤兌正秋也萬物之所說也故曰說言乎兌戰乎乾乾西北之卦也言陰陽相薄也坎者水也正北方之卦也勞卦也萬物之所歸也故曰勞乎坎艮東北之卦也萬物之所成終而所成始也故曰成言乎艮

此文王後天卦也八方之位四時之序萬物之出入

莫不由之

右第五章

神也者妙萬物而為言者也動萬物者莫疾乎雷撓萬物者莫疾乎風燥萬物者莫熯乎火說萬物者莫說乎澤潤萬物者莫潤乎水終萬物始萬物者莫盛乎艮故水火相逮雷風不相悖山澤通氣然後能變化既成萬物也

帝神之主也神妙萬物變化萬物而成之故先天立

法象之體則後天為流行之用後天立時位之體則  
先天為神化之用莫非易也故曰天地設位而易行  
乎其中矣

右第六章

乾健也坤順也震動也巽入也坎陷也離麗也艮止也  
兌說也

乾健也凡健皆乾坤順也凡順皆坤八者盡萬物之  
性情

右第七章

乾為馬坤為牛震為龍巽為雞坎為豕離為雉艮為狗  
兌為羊

遠取諸物則八卦為八物

右第八章

乾為首坤為腹震為足巽為股坎為耳離為目艮為手  
兌為口

近取諸身則一身為八卦

右第九章

乾天也故稱乎父坤地也故稱乎母震一索而得男故謂之長男巽一索而得女故謂之長女坎再索而得男故謂之中男離再索而得女故謂之中女艮三索而得男故謂之少男兌三索而得女故謂之少女

八卦定而父母男女合上天下地而成一家一家之中又分父母男女而自成八卦三才之義豈不重乎

右第十章

乾為天為園為君為父為玉為金為寒為冰為大赤為  
良馬為老馬為瘠馬為馱馬為木果坤為地為母為布  
為釜為吝嗇為均為子母牛為大輿為文為衆為柄其  
於地也為黑震為雷為龍為玄黃為專為大塗為長子  
為決躁為蒼筤竹為萑葦其於馬也為善鳴為馵足為  
作足為的顙其於稼也為反生其究為健為蕃鮮巽為  
木為風為長女為繩直為工為白為長為高為進退為  
不果為臭其於人也為寡髮為廣顙為多白眼為近利

市三倍其究為躁卦坎為水為溝瀆為隱伏為矯輮為  
弓輪其於人也為加憂為心病為耳痛為血卦為赤其  
於馬也為美脊為亟心為下首為薄蹄為曳其於輿也  
為多青為通為月為盜其於木也為堅多心離為火為  
日為電為中女為甲冑為戈兵其於人也為大腹為乾  
卦為鼈為蟹為羸為蚌為龜其於木也為科上槁艮為  
山為徑路為小石為門闕為果蓏為閭寺為指為狗為  
鼠為黔喙之屬其於木也為堅多節兌為澤為少女為

巫為口舌為毀折為附決其於地也為剛鹵為妾為羊  
以言乎天地之間則備矣乾為馬須知馬為乾坤為  
牛須知牛為坤至於龜鼈羸蚌之微狗鼠黔喙之屬  
皆為離為艮常人見其為物聖人見其為易故曰易  
者非他現前之物也然而不識易徒見物之為易又  
非易也神而明之存乎其人

右第十一章

序卦傳

有天地然後萬物生焉盈天地之間者惟萬物故受之以屯屯者盈也屯者物之始生也物生必蒙故受之以蒙蒙者蒙也物之穉也物穉不可不養也故受之以需需者飲食之道也飲食必有訟故受之以訟訟必有衆起故受之以師師者衆也衆必有所比故受之以比比者比也比必有所畜故受之以小畜物畜然後有禮故受之以履履而泰然後安故受之以泰泰者通也物不

可以終通故受之以否物不可以終否故受之以同人  
與人同者物必歸焉故受之以大有有大者不可以盈  
故受之以謙有大而能謙必豫故受之以豫豫必有隨  
故受之以隨以喜隨人者必有事故受之以蠱蠱者事  
也有事而後可大故受之以臨臨者大也物大然後可  
觀故受之以觀可觀然後有所合故受之以噬嗑嗑者  
合也物不可以苟合而已故受之以賁賁者飾也致飾  
然後亨則盡矣故受之以剝剝者剝也物不可以終盡

剝窮上反下故受之以復復則不妄矣故受之以无妄  
有无妄然後可畜故受之以大畜物畜然後可養故受  
之以頤頤者養也不養則不可動故受之以大過物不  
可以終過故受之以坎坎者陷也陷必有所麗故受之  
以離離者麗也

有天地然後有萬物有萬物然後有男女有男女然後  
有夫婦有夫婦然後有父子有父子然後有君臣有君  
臣然後有上下有上下然後禮義有所錯夫婦之道不

可以不久也故受之以恒恒者久也物不可以久居其所故受之以遯遯者退也物不可以終遯故受之以大壯物不可以終壯故受之以晉晉者進也進必有所傷故受之以明夷夷者傷也傷於外者必反其家故受之以家人家道窮必乖故受之以睽睽者乖也乖必有難故受之以蹇蹇者難也物不可以終難故受之以解解者緩也緩必有所失故受之以損損而不已必益故受之以益益而不已必決故受之以夬夬者決也決必有

所遇故受之以姤姤者遇也物相遇而後聚故受之以萃萃者聚也聚而上者謂之升故受之以升升而不已必困故受之以困困乎上者必反下故受之以井井道不可不革故受之以革革物者莫若鼎故受之以鼎主器者莫若長子故受之以震震者動也物不可以終動止之故受之以艮艮者止也物不可以終止故受之以漸漸者進也進必有所歸故受之以歸妹得其所歸者必大故受之以豐豐者大也窮大者必失其居故受之以

以旅旅而無所容故受之以巽巽者入也入而後說之  
故受之以兌兌者說也說而後散之故受之以渙渙者  
離也物不可以終離故受之以節節而信之故受之以  
中孚有其信者必行之故受之以小過有過物者必濟  
故受之以既濟物不可窮也故受之以未濟終焉

離卦傳

乾剛坤柔比樂師憂臨觀之義或與或求也見而不失  
其居蒙雜而著震起也艮止也損益盛衰之始也大畜  
時也无妄災也萃聚而升不來也謙輕而豫怠也噬嗑  
食也賁无色也兌見而巽伏也隨无故也蠱則飭也剝  
爛也復反也晉晝也明夷誅也井通而困相掩也咸速  
也恒久也渙離也節止也解緩也蹇難也睽外也家人  
內也否泰反其類也大壯則止遯則退也大畜有象也同

人親也革去故也鼎取新也小過過也中孚信也豐多  
故親寡旅也離上而坎下也小畜寡也履不處也需不  
進也訟不親也大過顛也姤遇也柔遇剛也漸女歸侍  
男行也頤養正也既濟定也歸妹女之終也未濟男之  
窮也夬決也剛決柔也君子道長小人道憂也

周易簡說卷三